

En memoria da
**Vigeli Valier-Caviezel,
Domat / Camischolas**
1940 - 2009

Ils 31 d'octobre 2010 spira schon igl empren onn dapi che nies frar vegl ha stuiu prender nunspitgadamein e surprendent cumiau dil mund terrester. Disdidas dil cor eran entochen ussa en nossa famiglia nunenconuscent. Schebein el senteva che siu cor «funcziuna» buca scosauda savein buca giudicar. El ha stuiu bandunar nus memia baul. Cuort avon la prematura mort ha el giu visitau quasi tut ses fargliuns ed era telefonau cun biars enconuschents. Ord quei agir savein retroactiv supponer ch'el senteva silmeins nunsavend siu malesser.

Sco secund affon da Giachen Martin e Maria Luzia Valier-Cavegn ei el naschius a Camischolas igl emprem d'uost 1940. Suenter el ein aunc 7 fargliuns naschi. Sco fegl vegl ha el stuiu surprendent gia fetg baul gronda responsabladad.

El era ina persuna fetg aviarta e directa ed ha era adina palesau quei ch'el tertgava. Cun quei agir ha el forsa offendiu ina persuna ni l'autra. Denton era el fetg sincers ed haveva era in bien cor. Duront siu emprendissadi a Turitg saveva el veginr mo paucas gadas ad onn a casa, mo cun mauns vits vegneva el mai. Jeu saiel aunc bein seregundar digl emprem schenghetg ch'el ha giu fatg a mi ed a miu frar giuven. Da Nadal 1956 ha el giu purtau a nus dus



in tren cun entginas rodaias. Vitier ina locomotiva che saveva veginr messa en funcziun cun trer si cun ina clav. Cun quei bi schenghetg havein nus dus fatg biars onns termagls. Insumma l'entira famiglia teneva el fetg ault.

Las scolas primaras ha el giu frequen-tau a Sedrun e las secundaras a Camischolas. Igl imprendissadi da serrer ha el giu absolviu a Schöflisdorf nua ch'el ei pervia dil malencrescher mai sesentius bein. Il pli bugen havess el fatg scrinari. Da lezzas uras decideva plitost igl intruidader da clamada tgei ch'in giuven haveva d'emprender. Suenter la recruta ha el giu luvrav tier las Ovras Electricas Reinanterior a Sedrun. Muort il schliet clima da lavur ha el ed aunc entgins giuvens indigens fatg il fagot e serendi puspei ella bas-sa. Schegie ch'el era varga 40 onns buca pli sesents en Tujetsch, sesenteva



Vigeli cun sia dunna e sco giuven buob.

el en siu cor tuatschin tras a tras. La Tuatschina vegneva legida e tier quasi tuttas decisiuns ella Val deva el siu commentari. Igl onn 1968 ei el s'annunziaus tier la polizia cantunala, nua ch'el ei staus biars onns en survetsch tier la sparta d'investigaziun. Igl onn 1967 ha el maridau la giuvna Anita Caviezel da Domat ed ein seca-sai a Domat.

Igl onn 1968 ei il fegl Martin naschius e treis onn pli tard il fegl Renato. Igl onn 1985 han els piars il fegl giuven entras la maligna malsogna da leucemia. Sia crudeivla mort ei stada ina greva frida per la giuvna famiglia.

Vigeli ei staus ina persuna cun biars interess, in total «allrounder» ed inschignus. Sco giuvenot haveva el era massa ideas e plans. Deplorablamein ha ei muncau il necessari sustegn, pertgei el fuss staus ina predestinada persuna da luvar sur sesez. Tonpli admi-



rava el il success che siu fegl Martin ha cun siu biro d'inschignier.

Dapi la pensiun prendeva el e sia Anita bia temps per lur dus biadis Ursin e Nicolin. Silmeins in di per jamna gudevan els ils dus pigns. Ed en siu luvratori a Domat vegneva ei zambergiau e trafficau da tuttas uisas, quei che plascheva naturalmein als dus buobets. Hobis haveva il Vigeli biars e liunguri-ala enconuscheva el buca.

El e sia Anita gudevan il temps liber. Fagevan bein saveins viadis da lunsch e damaneivel e cultivavan era lur amicezias.

Per tut quels che Ti stevas fetg datier - principalmein per Ti'Anita cun famiglia ed ils pignets Ursin e Nicolin - eis ei stau grev da viver vinavon senza Tei e biars han piars in sincer amitg. Car Vigeli en nos cors ed en nos patratgs vivas Ti vinavon. Ruaussa en pasch.

Tiu frar Tumaisch